

王文公文集

五

一

二

三

四

五

六

王文公文集卷第十七

表

辭同修起居注狀七

再辭同修起居注狀五

辭集賢校理狀四  
辭知江寧府狀

辭赴闕狀三  
乞免就試劄子

辭男雱授龍圖劄子三

辭同修起居注狀

臣蒙恩差臣同修起居注者聖恩深厚臣非  
預首所能報稱然臣去年始蒙恩特除直集

賢院當是時臣已黽勉不敢久違恩指至今  
就職才及數月又蒙恩有此除授臣竊觀朝  
廷用人皆以資序臣入館最爲日淺而材何  
以異人終不敢貪冒寵榮以干朝廷公論伏  
望 聖慈察臣誠心非敢飾讓特賜追還所  
授

第二狀

臣昨進狀乞追還所授同修起居注敕準中  
書劄子奉 聖旨不許辭讓便令授敕供職  
伏念臣前奏所陳實繫朝廷用人之體非特



於臣私義有所不安伏望 聖慈檢會臣前  
奏特賜追還所授

第三狀

臣昨進狀乞追還所授同修起居注敕準中  
書劄子奉 聖旨不許辭讓便令受敕供職  
疏遠小臣上煩朝廷敦獎如此而區區所陳  
終不敢止者誠以謂進在臣先而才行當蒙  
選擢而與之則與之宜有先後臣入館資序  
最爲在後而獨先被選竊以爲非朝廷用人  
之體此臣所以不敢受也臣異時得以叙進

臣雖不肖豈敢復辭且臣已嘗辭避職事而不爲朝廷所察今若又迫於敦喻黽勉供職則是臣每飾辭讓之虛文以玩黷朝廷人雖不以爲言臣亦何顏以立於世蓋人臣事君苟心知其甚不可則寧得罪而有不從况臣幸在聖人至仁隆寬盡下之時謹分守以辭其所不當得之寵榮必無放命之罰則朝廷之命雖欲必行而不改臣之愚心亦將固守而不移伏望 聖慈察臣如此早賜追還所授

第四狀

臣累進狀乞免同修起居注又準中書劄子  
奉 聖旨不許辭讓便令受敕供職卑賤之  
臣屢煩 聖恩敦喻誠惶誠恐不知所措然  
臣聞人無信不立臣事君以忠忠者不飾行  
以徼榮信者不食言以從利臣固嘗曰朝廷  
之命雖欲必行而不改臣之愚心亦將固守  
而不移若臣既有此言而終於託不得已以  
饗寵授則是臣飾偽食言而實無自守之義  
非所以稱朝廷獎遇之意而明區區避讓之

本心寧以違命受譴終不敢身爲浮僞之首  
以傷聖時忠實之化伏望 聖慈早賜追還  
所授

第五狀

臣進狀乞免同修起居注準中書劄子奉  
聖旨依累降指揮更不得辭讓便令授敕供  
職 聖恩所以加臣者如此非臣陷曾隕首  
所能報稱然臣愚不肖不知朝廷必欲度越  
衆人而加臣以此者何也爲其賢於人也固  
有廉讓忠信之實也度越衆人而貪其所不

當得非所以為廉讓知其不當得而辭於上  
以為朝廷之命雖欲必行而不改臣之愚心  
亦將固守而不移然終於託不得已以私其  
寵利非所以為忠信無廉讓無忠信然而朝  
廷必欲度越衆人而加之以其所不當得之  
職事臣恐執政大臣必受比周朋黨之嫌

陛下必獲不察蔽欺之謗臣亦不得自託於  
忠廉之行而居下姦利之人窺朝廷之間爭  
飾偽讓以徼一時之幸而有傷忠厚之俗其  
事如此矧朝廷不可以不深思而聽臣之辭

臣亦不可以不固守而違朝廷之命誠願  
陛下日月之明察臣今日之請辭窮理極非  
如向時避讓職事猶在可冒之地雖由此得  
罪必不敢以身為亂俗之首伏乞斷自聖  
心無牽於左右大臣之過論特賜追還所授

第六狀

臣累進狀乞免同修起居注奉聖旨不許  
進狀辭讓者聖恩深厚一至于此臣誠惶  
誠恐震怖不知所出竊觀朝廷近日辭讓職  
事未嘗有蒙聽許者而臣又嘗辭讓職事而

不為朝廷聽許矣今復守辭讓之說以請於  
朝廷固宜 聖恩不即聽許然臣已習見朝  
廷未嘗許人辭讓職事而猶惓惓自陳所守  
不避偽讓之嫌誠以螻蟻微誠自誓終不敢  
受冀蒙 天聰終初省察而已今若迫於恩  
指遂叨寵利則人雖不以為言臣實無顏以  
處使臣負偽讓之謗則朝廷豈免濫恩之譏  
臣雖不肖義實不敢安此且方今之所患而  
務絕者方在於進取而不在於辭讓方在於  
欺罔而不在於忠信臣若託不得已終叨寵

利不顧其已出之言則是去辭讓而引進取  
毀忠信而爲姦罔朝廷本欲拔取人才而所  
得者乃有去辭讓毀忠信之嫌恐非所以示  
天下而厲士大夫之操也此臣所以不敢避  
放命之罰而守其區區之說誠不敢以身累  
國非特欲全其私義而已也伏望 聖慈即  
賜聽許令朝廷不失所授之宜臣亦不失所  
守之信臣不任

第七狀

臣昨進狀乞免同修起居注準中書劄子奉



聖旨朝廷已行擢用依累降指揮不得違避者孤賤之臣行能淺薄當朝廷清明收用賢儁之時幸得著外庭豈非榮顯况又蒙拔擢備任清要丁寧獎勵使必就官此雖隕首刳心自知無以報稱然臣所以不敢受命而猶守其區區之說者誠以資在臣前尚有未蒙選者臣若苟見寵利之可得而忘避讓之義苟知避讓而不能固其所守非朝廷所以拔擢臣之意又非臣所以報稱朝廷之心且誣已行之命以伸自守之志者朝廷之令名食

言喪志以順命為悅而饕寵利者臣之醜行  
今朝廷重得令名而使臣輕為醜行此臣之  
所不論也臣幸蒙任使備官三司列職儒館  
若朝廷以為可任異時以次升擢於分不為  
進越則臣雖不肖其亦何說之敢辭誠望  
聖慈哀臣懇迫檢會臣前後所奏察其理有  
可言特賜追還所授

再辭同修起居注狀

右臣今月二十六日準勅差臣同修起居注  
伏念臣行能無異眾人入館最為日淺向叨

選擢嘗已固辭幸蒙 聖恩方賜聽許今同  
館之士才能資序出臣右者尚多而又蒙誤  
恩有此除授在臣理分固不敢當兼臣久住  
京師親老口衆而自春至今疾病相仍醫藥  
百端未得平愈近已進狀乞一知州軍差遣  
伏望 聖慈察臣誠懇特賜追還所授除一  
知州軍差遣使臣無進越冒榮之罪而得紓  
私養之急所有同修起居注敕牒臣不敢授  
謹具狀奏聞伏候敕旨

第二狀

右臣進狀乞免同修起居注準中書劄子奉  
聖旨不許辭讓便令授敕臣愚不肖幸當朝  
廷拔擢賢雋之時獨蒙不次之選豈不榮哉  
然臣入館最爲日淺而行能無異衆人故不  
敢度越衆人以饗寵利向時守此說以辭朝  
廷之命至於八九而 聖恩不以臣言爲不  
信幸賜聽許今纔數月同館之士資序在臣  
右而行能足充此選者尚多遽蒙 聖恩有  
此除授令臣今而可授則向之辭命至於八  
九者果何心也昔鄭以子石爲卿則辭太史

退則又使之命已命已則又辭焉三辭而後受冊於是子產始惡其爲人夫子產所以惡之者不以其飾辭讓而無忠實之志乎臣之蒙恩雖出於無求然始則託辭讓之名以煩恩朝廷終則徼一日之利以忘前言之信推事考情亦何以異於子石臣誠固陋終不敢奸子產之所惡以上昭聖時任人之失且朝廷必以臣粗習文藝而忠信可使則臣固嘗曰異時循次選用則臣不敢辭伏望 聖恩察臣誠懇特賜追還所授除臣一知州軍差

遣使臣得遂前言之信而又有以紓親養之急臣不任祈恩待報之至

第三狀

右臣近進狀乞免同修起居注準中書劄子奉 聖旨令依前後指揮不許辭免便令授 敕者 聖恩加臣無窮臣愚固守無已臣誠惶誠恐震怖不知所爲然臣義有所不敢爲故不敢冒恩而苟止伏念臣以資序在臣右而行能宜蒙此選者尚多故嘗自列至於八九幸蒙 聖恩聽察而所除始祖無擇一人

若臣今遂冒居則是謂在臣右者已無可選  
臣以應舉入仕磨勘遷官本圖官達非敢苟  
爲高抗至於恩踰理分度越衆人官謗所歸  
臣亦不敢苟得以忘前言之信兼臣自春至  
今疾病相仍加以氣衰舊學幾廢親老口衆  
久住京師近嘗進狀乞一閑慢州軍差遣伏  
見近例見任修起居注以便親求罷出補外  
官嘗蒙朝廷聽許蓋當聖時務以仁恕優容  
臣下則以便親而求外補意朝廷之所宜從  
伏望 聖慈哀臣懇迫特賜追還所授除臣

一知州軍差遣以便私養且令臣無進越冒榮之罪所有同修起居注敕牒臣不敢受臣不任祈恩待報激切之至

第四狀

右臣近進狀乞免同修起居注準中書劄子奉聖旨令依累降指揮便授敕更不得辭免者臣之懇懇已具前奏螻蟻微誠未能上動聖聽臣誠惶怖不知所爲然臣愚不肖以謂朝廷革因循之弊以不次官人當得異能之士然後允衆人之望而因循之弊可以



遂除臣治身則行能不備居官則職業無稱  
雖知好學而所得未可以施於實用故嚮蒙  
選擢即自以行能無異衆人而不敢度越衆  
人受職幸蒙聽許才及數月即欲度越衆人  
言行本末不相顧如此豈稱朝廷選擢之意  
雖令言者不以是爲臣罪臣實無顏以處伏  
望 聖慈察臣累奏情理備盡特賜追還所  
授臣不任祈恩待報激切之至

第五狀

右臣近進狀乞免同修起居注準中書劄子

奉 聖旨依前降指揮便授敕供職臣之區  
區辭說已窮然不敢避逋慢之罪而苟止者  
非特欲守前言之信亦不敢上累朝廷蓋臣  
有冒榮失守之罪則朝廷亦有選授失人之  
謗因啓天下好利之士僞讓以要君則甚傷  
聖時風俗此臣之所大懼也若 聖恩幸聽  
臣言使臣得安理分則臣爲不失所守臣能  
不失所守則朝廷不失所選矣朝廷不失所  
選而又隆寬廣裕以曲盡臣志謂宜無傷而  
適足以感厲天下之士且朝廷以臣粗涉藝

文忠信可使不復責其行能之備必欲擢置  
從官則臣固嘗曰臣以備官三司列職儒館  
若終免於罪戾則循次受選自不為遲當朝  
廷清明拔用賢雋有志之士孰不幸願寵榮  
如臣之愚豈獨異於衆人誠以不敢度越衆  
人故嘗自列至於八九朝廷隆寬盡下已嘗  
幸聽臣言曾未數月臣即不復自顧前言之  
信若令言者謂臣要君以僞臣誠無辭可以  
自明伏望 聖慈察臣所守如此臣誓堅死  
節上報 聖知臣不任祈恩待報之至

辭集賢校理狀

右臣今月二十二日準中書差人齎到敕牒  
一道除臣集賢校理聞命震怖不知所以伏  
念臣頃者再蒙 聖恩召試臣以先臣未葬  
二妹當嫁家貧口衆難仁京師乞且終滿外  
任比蒙矜允獲畢所圖而明衰祚薄祖母二  
兄一嫂相繼喪亡奉養婚嫁葬送之窘比於  
向時為甚所以今茲纔至闕下即乞除一在  
外差遣不願就試以臣疵賤謬蒙拔擢至於  
館閣之選豈非素願所榮然而不願就試正

以舊制入館則當供職一年臣方甚貧勢不可處此臣所以不敢避干紊朝廷之罪而苟欲就其營養之私不圖朝廷不加考試有此除授臣若避犯命之罰受而不能自列則是臣前所乞爲以私養要君而誤陛下以無名加寵也又聞朝廷特與推恩不候一年即與在外差遣且一年供職乃是朝廷舊制臣以何名敢當此恩而累朝廷隳廢久行公共之法又見新制近臣薦舉官吏非條詔指揮不得用例施行令出已來未能十日今臣有

此除授乃因近臣薦舉不加考試又非條詔  
指揮臣雖不肖獨何敢冒過分之寵而以身  
爲廢法之首乎伏望 聖慈察臣本意從臣  
私欲追還所授特與除一在外合入差遣則  
使公義不虧於上私行不失於下臣不任激  
切祈恩待報之至所有敕牒臣不敢受謹具  
狀奏聞

第二狀

右臣三月二十二日準中書差人齎到敕牒  
一道除臣集賢校理臣以分不當得已具狀

陳列乞追還所授今日五日又準中書差人齎到敕牒令臣受職不得辭免臣以微賤誤蒙采拔非臣墮首足以報稱然分有所不敢受名有所不敢居寧以恩上得罪終不敢冒恩苟止何則臣以擇利辭試而朝廷因與免試推恩是臣以辭試上要朝廷而朝廷果以恩澤副之也不獨傷臣私議固以上累國體此臣所以惓惓至於再三而終不敢止且勸沮之方失不在大如臣心實擇利而迹有辭讓之嫌以故朝廷特有優假臣恐進趨之士

有以窺度聖世將或立小異以近名託虛名以邀利浸成弊俗非復法令所能禁止此亦朝廷所宜慎惜不當遂已成之命而難於追改也竊見近臣比有辭讓官職皆義所當得而特以禮辭讓朝廷固宜必使受之而不聽如臣卑賤今所陳列直以分不當得非敢以爲讓也伏望 聖慈聽臣所守特與追還所授臣區區之誠期於得請而後敢已所有敕牒臣不敢受

第三狀



右臣三月二十二日準中書差人齎到敕牒  
一道除臣集賢校理臣以分不當得已再具  
狀奏聞乞追還所授今日九日又準中書差  
人齎到敕牒令臣不得辭免是臣區區之意  
終未蒙朝廷省察臣於他官苟可以得則或  
悉力以求之唯恐利之不多而勢之不便非  
能有所辭讓也至於私養之不給則苟求冒  
取亦無所不至今朝廷特以爲校理則再  
三千紊朝廷而終不敢受者誠以要君罔上  
之罪大故寧以他得罪而於此不敢順命苟

止也所謂要君者臣前狀已言之矣所謂罔  
上者朝廷除校理必先考試今獨推恩異於  
尋常朝廷不以臣爲小有異能則必以臣爲  
小有異行臣無其實而敢冒此恩此乃所謂  
罔上也且臣蒙恩與試久矣臣非敢終辭也  
特以勢未便爾若朝廷且從臣欲使臣他日  
之力足以供職京師而無乏養之憂則臣自  
當援恩求試豈敢上煩朝廷敦迫何必遽加  
特恩使朝廷爲苟舉而臣爲苟得者乎臣聞  
之古人曰明主可以理奪又曰匹夫不可奪

志臣敢守此語以至於再三伏乞 聖慈特  
賜矜允煩冒天威臣無任祈恩待報惶恐迫  
切之至

第四狀

右臣蒙恩除集賢校理以分不當得已累曾  
具狀奏聞乞追還所授今月二十四日準中  
書劄子奉 聖旨更不許辭讓臣以小官非  
敢以禮為讓也直以分不當得理當自言蓋  
聞當得而讓則上有所不得聽不當得而授  
則下有所不敢承不聽不為迫下不承不為

慢上以其有義也臣誠不肖然區區之私具  
狀四奏者竊以爲匹夫之志有近於義是以  
仰迫恩威至於再三終不敢受伏望 聖慈  
俯察臣愚特與追還所授臣無任

辭知江寧府狀

右臣今月初九日進奏院遞到敕牒蒙恩差  
知江寧軍府事犬馬之疹自隔清光天地之  
恩曲垂眷恤以臣丘墓所在就付兵民之權  
非臣肝膽塗地所能報稱萬一然臣所抱疾  
病迄今無損若輒冒恩黽勉典領當路大藩

恐力用無以上副朝廷寄任伏望 陛下察  
臣如此儻以臣逮侍 先帝未許分司則乞  
除臣一留臺宮觀差遣冀便將理終獲有瘳  
誓當捐軀少報 聖德所有敕牒臣未敢祇  
受已送江寧府收管謹具狀奏聞

辭赴闕狀

治平二年七月二十七日

右臣準中書劄子伏奉 聖恩以臣喪服既  
除特授故官召令赴闕罪逆餘生尚蒙齒錄  
非臣墮首所能報稱理當即日奔走就塗而  
臣抱病日久未任跋涉見服藥調理乞候稍

瘳即時赴闕謹具狀奏聞

第二狀

右臣伏準中書劄子奉 聖旨令體認朝廷  
累降指揮疾速發來赴闕臣愚無狀屢蒙  
聖恩逮及自非抱疹不任職事豈敢故為逋  
慢臣近已奏陳乞一分司官於江寧府居住  
伏望 聖慈特賜矜許所冀便於將理終獲  
有瘳則臣雖自知無補於 聖時猶當乞備  
官使仰副朝廷眷錄之意

第三狀

右臣伏準中書劄子奉 聖旨令依累降指  
揮發來赴闕蝼蟻微誠不能感動至煩朝廷  
恩旨屢降臣實惶怖不知所為伏念臣本以  
孤生實無才用誤蒙 仁宗拔擢備數從官  
當 大行皇帝亮陰之際始以親喪解職久  
尸榮祿無補聖時今 陛下以仁孝之資纘  
承聖緒臣於私養旣無所及唯當追 先帝  
之遇致身於 陛下之時若自度力用堪任  
職事何敢逋慢朝廷詔令至於經涉歲時緣  
臣自春以來抱疹有加心力稍有所營則所

苦滋劇所以昧冒奏陳乞且分司實冀稍可  
支持即乞復備官使天聽高邈未蒙矜允雖  
欲扶伏奔走闕廷而力與願違不能自強伏  
望 聖慈察臣懇迫令檢會臣累奏特賜指  
揮臣無任瞻天屏營激切之至

乞免就試劄子

準中書劄子奉 聖旨依前降指揮發來赴  
闕就試者伏念臣祖母年老先臣未葬弟妹  
當嫁家貧口衆難住京師比嘗以此自陳乞  
不就試慢廢朝命尚宜有罪幸蒙寬赦即賜



聽許不圖遜事之臣更以臣為恬退令臣無  
葬嫁奉養之急而逡巡辭避不敢當清要之  
選雖曰恬退可也今特以營私家之急擇利  
害而行謂之恬退非臣本意兼臣罷縣守闕  
及今二年有餘老幼未嘗寧宇方欲就任即  
令赴闕實於私計有妨伏望 聖慈察臣本  
意止是營私特寢召試指揮且令終滿外任  
一面發赴本任去訖

辭男雱授龍圖劄子三

臣伏承

聖恩以修撰經義罷局除臣男某

龍圖閣直學士臣雖以懇辭未蒙照察伏念  
臣男某誤蒙 陛下知獎特以粗知承學比  
奉 聖旨撰進經義尚未了畢遂自太子中  
允崇政殿說書擢授右正言充天章閣待制  
兼侍講當是時所叨恩命已駭衆人觀聽在  
臣父子已所難安伏蒙宣諭令臣更勿辭免  
臣亦以謂 聖恩錄進書微效遂不敢辭自  
爾以來虜以疾病隨臣不敢預聞經義職事  
今茲罷局在虜更無尺寸可紀之勞不知何  
名更受褒賞非特於臣父子私義所不敢安

竊恐朝廷賞罰之公如此極爲有累伏望  
聖慈察臣懇悃追寢誤恩非特臣父子曲蒙  
保全亦免衆人於聖政有所譏議

### 第二劄子

臣伏奉 詔書以臣乞免臣男某恩命未賜  
允俞臣之懇款已備前陳螻蟻微誠未能昭  
徹然國家之賞典務在報功施之非宜實累  
國體非特在臣父子私義所不敢安伏惟大  
明無所不燭察臣非敢妄干 聖聽早賜追  
寢誤恩謹具劄子陳免以聞

第三劄子

臣近累具劄子辭免臣男某恩命伏蒙 聖  
慈特降詔書不允者臣之懇誠已具前奏  
聖恩深厚未即矜從在臣區區實不寧處如  
臣叨昧尚所難勝况又賤息何名享此賞而  
無勸累國實多伏望 聖慈察臣懇款早賜  
追還成命使臣父子皆荷 陛下全度之至  
恩所以上報生當隕身死當結草而已謹三  
具劄子陳免以聞

王文公文集卷第十七

王文公文集卷第十八

表

謝知制誥表

謝翰林學士表

謝叅知政事表

謝除左僕射表

熙寧八年七月

謝除昭文表

謝除史館表

謝依前本官充觀使表

謝特授儀同封舒國公表

謝特進封荆國表

謝加食邑表

謝加南郊恩表

謝知江寧表二

常州謝上表

代上明州到任表

謝免南郊陪位表

謝免明堂陪位表

謝雱免中允說書表

謝賜弟安國及第表

謝弟安國得館職表

謝差弟安上令授勅命不許辭免表

謝添差男旁甸當江寧府糧料院表

謝雱除正言待制表

謝知制誥表

臣某言伏奉 聖恩授臣前件官者高華之

選欲報嘗艱固陋之身以榮為懼中謝竊以自

古招智能之士因使為侍從之臣豈特賴其

虛名謂能華國蓋將收其實用相與致君矧

號令文章之為難而討論潤色之所寄苟失

職不稱則為時起羞伏惟 皇帝陛下躬上

聖之資撫乂安之運趨時有救弊之急守器

有持盈之難當得俊良使陪遺忘則典司明

命出入禁門一有壞官尤為累上臣羈單賤

士鄙朴常人仕初有志於養親學遂不專於

爲已比更煩使稍竊謬恩內懷尸祿之慙仰  
負食功之意又蒙採擢以至超踰蓋君之視  
臣不使同犬馬之賤則下之報上亦欲致岡  
陵之崇况臣少習藝文粗知名教遭逢一旦  
度越衆人唯當盡節於明時豈敢上懷於私  
計臣無任瞻天荷聖激切屏營之至

謝翰林學士表

臣聞人臣之事主患在不知學術而居寵有  
冒昧之心人主之畜臣患在不察名實而聽  
言無惻怛之意此有天下國家者所以難於



任使而有道德者亦所以難於進取也學士  
職親地要而以討論諷譏爲官非夫遠足以  
知先王近足以見當世忠厚篤實廉恥之操  
足以咨諏而不疑草創潤色文章之才足以  
付託而無負則在此位爲無以稱如臣不肖  
涉道未優初無犖犖過人之才徒有區區自  
守之善以至將順建明之大體則或踈闊淺  
陋而不知加以憂傷疾病久棄里閭辭命之  
習蕪廢積年阻勉一州已爲忝冒禁林之選  
豈所堪任伏惟 皇帝陛下躬聖德承聖緒

於群臣賢不肖已知考慎而於其言也又能虛  
己以聽之故聰明睿智神武之實已見於行事  
日月未久而天下翹首企踵以望唐虞成周  
之太平臣於此時實被收召所以許國義當  
如何敢不磨礪淬濯已衰之心紬繹溫尋久  
廢之學上以備顧問之所及下以供職司之  
所守

謝叅知政事表

承弼之任賢智所難顧惟缺然何以堪此仰  
膺成命弗獲固辭中謝竊以古先哲王考慎

厥輔皆有一德用成衆功伏惟 皇帝陛下  
含獨見之明踐久安之運甫終諒闇將大施  
爲宜得偉人與圖庶政如臣者徒以承學粗  
知義方本無它長可備官使退安私室自絕  
榮塗旣負采薪之憂因逃竊位之責大明繼  
燭正路宏開付以蕃宣還之侍從清閒之宴  
或賜開延淺陋所聞每蒙知獎以爲奉令承  
教庶幾無尤當軸處中良非所稱龍光曲被  
震媿交懷此蓋伏遇 皇帝陛下德懋旁求  
志存遠舉隆寬盡下故忠良有以輸心公聽

並觀故讒慝不能肆志矧睿謀之天縱方聖  
治之日躋思稱所蒙敢忘自竭遠猷經國雖  
或媿於前修直道事君期不隳於素守臣無  
任

謝除左僕射表

熙寧八年七月

貳令中臺兼官左省惟時遴選蓋嘗以曠而  
弗除忽此叨居顧豈微勞之可稱陪敦厥邑  
敷告于廷是皆至榮難以虛辱臣某誠榮誠  
感頓首頓首竊以經術造士實始盛王之時  
僞說誣民是為衰世之俗蓋上無躬教立道

之明辟則下有私學亂治之蕪氓然孔氏以  
羈臣而與未喪之文孟子以游士而承既沒  
之聖異端雖作精義尚存逮更煨燼之災遂  
失源流之正章句之文勝質傳注之博溺心  
此淫辭詖行之所由昌而妙道至言之所爲  
隱篤生上主純佑下民成能協乎人謀將聖  
出乎天縱作於心而害事放斥幾殫通於道  
以治官延登旣衆尚懼膠庠之黎獻未昭典  
籍之群疑乃集師儒具論科指繕書來上褒  
典俯加臣趣操弗高知識尤淺少嘗勤苦但

爲裘氏之吟晚更耄衰豈免輪人之議初備  
使令之乏即知稱愜之難敢意誤恩獨當殊  
獎此蓋伏遇 皇帝陛下以化民成俗爲事  
故急在誨人以尊德樂道爲懷故易於縻爵  
因忘固陋特假龍光祗服訓辭深惟報禮雖  
無博學對揚稽古之鴻名庶以雅言助廣右  
文之美化臣無任

謝除昭文表

臣某言伏奉 制命特授臣同中書門下平  
章事昭文館大學士兼譯經潤文使加食邑

一千戶食實封四百戶仍改賜推忠協謀同  
德佐理功臣尋具表陳免蒙降批荅不允仍  
斷來章者承流宣化方虞失職之誅經體贊  
元更誤選賢之舉

中謝

臣竊惟人物之會通

常寡實以君臣之遇合至難自匪同聲氣之  
求孰能借功名之享伏惟 皇帝陛下天縱

大聖人與成能乘百年久安之機飾千歲積  
壞之蠱士誠服矣而持祿養交之習未殄民  
允懷矣而樂事勸功之志未純近或長阨而  
仁義之澤未流遠或虛僑而道德之威未立

宜選於衆舉格于皇天之材使暨乃僚績迪  
我高后之事冀勝所任以濟斯時而臣蚤見  
知於隱約之中久獨立於傾搖之上勲庸弗  
效恩禮更加託備外藩俯鄰其歲遂叨詔獎  
還冠宰司自視羈單所懷蹇淺方古耕築則  
有其陋爲世聘求則無其賢然以投老之軀  
而遭難值之運苟貪歲月趣就涓埃且上之  
施旣光則下之報宜厚與之戮力仰承睿智  
之臨罔不同心俯賴忠良之協誓殫踈拙圖  
稱休明臣無任



謝除史館表

臣某言伏奉 恩命特授金紫光祿大夫行  
尚書禮部侍郎同中書門下平章事監修國  
史上柱國進封開國公加食邑一千戶食實  
封四百戶仍賜推忠協謀佐理功臣尋具表  
陳免蒙批荅不允仍斷來章者揚于大廷寵  
以高位歸之翊戴之重諉之宰制之平聖心  
方慎於旁求小已知難於上稱臣某誠惶誠  
懼頓首頓首臣聞人君代天而理物人臣資  
父以事君然而君臣之大義有方非若父子

之至恩無間湏倡而後和則誠意每患於難  
通不入而後量則忠力或嫌於自獻唯成湯  
之聽伊尹與傅說之遇高宗皆以䟽遠而相  
求何其親厚之獨至蓋所趣非由於二道故  
所爲若出於一身夫豈干越夷貉之異心是  
謂元首股肱之同體二臣旣以此獲展事君  
之義兩君亦以此得成理物之功苟非其人  
孰與於此臣受材單寡逢運休明初涉獵於  
藝文稍扳緣於祿仕曩塵近侍積媿空餐悲  
遽隔於庭闈分長依於丘壠俄值纂承之慶

繼叨收召之榮責以論經尚少知於訓詁使  
之豫政曾莫助於猷爲矧以拙直而見知遂  
爲姦回之所忌伏遇 皇帝陛下納之以天  
地之量照之以日月之明數加獎勵之恩每  
辨讒誣之巧重遭卜相申敕備官終遜避之  
無繇更兢慙於非據伏惟 皇帝陛下樂古  
訓之獲而忘其勢惡邪辭之害而斷以心勿  
貳於任賢務本以除惡使萬邦有共惟帝臣  
之志萬姓有一哉王心之言則進無求名之  
私退有補過之善臣之願也天實臨之臣無

任

謝依前本官充觀使表

臣某言伏奉制命除授依前行尚書右僕射  
充觀文殿大學士集禧觀使者屢黷天威坐  
彌年所曲從危懇仰荷至慈中謝伏念臣學  
止求心行多違俗少隨官牒徒有志於養親  
晚誤聖知欲忘身而許國疲曳久瘵於宰事  
閔凶適在於私門中解繁機特上煩於矜惻  
外分憂寄復難強於支持方累鴻私更尸殊  
寵旣矜慙於非據輒冒昧以終辭伏蒙

陛下示以優容屢垂訓獎赦其逋慢終賜矜全猶加秘殿之隆名俯慰窮閭之衰疾地崇祿厚尚非空食之所宜歲晚力德雖欲捐軀而曷報臣無任

謝特授儀同封舒國公表

臣某言伏奉 制命特授開府儀同三司封舒國公者發號端門外覃慶賜䟽恩列辟俯逮空滄舞手均歡捫心獨幸 中謝伏念臣久孤眷遇當即譴訶曠歲籲天尚辭榮而未獲新恩賜國仍寵席以有加唯茲邦土之名自

昔官遊之壤久陶聖化非復魯僖之所懲積  
習仁風乃嘗朱邑之見愛鴻私所被朽質更  
榮此蓋 皇帝陛下道冒群才彌天之所覆  
恩涵庶品并物之所包以釐事備於郊宮而  
惠澤均於海宇故雖幽屏弗以遐遺顧冒昧  
之不貲豈糜捐之可報臣無任

謝特進封荆國表

臣某言伏奉 勅命授臣特進荆國公加食  
邑四百戶食實封一百戶勲如故者宮庭嘉  
享推德惠以及人田里空餐濫宸恩而累國

臣中謝伏念臣苦窳賤質卷曲散材遭值休  
辰登備貴器有未償之厚責無可錄之微勞  
敢冀瘝身尚叨徽數此蓋 皇帝陛下備成  
熙事答四表之歡心董正治官建一代之明  
制因令疲苴與被光榮雖自誓於糜捐顧何  
疇於責恃臣無任

謝加食邑表

臣某言伏奉誥命加食邑四百戶實封一百  
戶者顯相郊宮固宜寵獎曠居田里乃濫褒  
加臣中謝伏念臣尚負宿病久尸榮祿無可

論之薄效有未報之隆恩方國明裡庶工祇  
載奉璋執豆旅幣獻琛具輸奔走之勞獨抱  
滯留之歎豈圖踈遜亦冒寵光此蓋 皇帝  
陛下荷休駿厖歛福敷錫故雖幽屏弗以遐  
遺身每被於慈憐心敢勞於勤策臣無任

謝加南郊恩表

解澤旁流明綸俯被永惟叨昧深以兢榮臣  
中謝竊以時郊丘之承所以尊上帝疇官邑  
之賜所以富善人盛福靡專至恩惟稱臣久  
塵要近上累明昭方玉輅之親祠以銅符而



外守逮均休慶例獲褒加此蓋伏遇 皇帝  
陛下以平施於萬方無遐遺之一物矧蒙圖  
任之舊特荷獎知之深祗服訓辭敢忘報禮

謝知江寧府表

稽違詔令經涉歲時 先帝登遐既不獲奔  
馳道路 陛下即位又未嘗瞻望闕廷所憂  
後至之刑誅敢冀就加於官使雖知黽勉尚  
懼顛隳臣某誠感誠懼頓首頓首蓋聞因任  
以責群材原省以通衆志厥或抱能而可用  
則雖負疾而見容如臣者逮侍 先朝叨官

外制惓惓許國雖有愚忠役役隨人但尸榮  
祿銜哀去位嬰疹彌年望絕龍光分投冗散  
伏遇 皇帝陛下紹膺尊極俯燭幽微延之  
以三節之嚴付之以十城之重比緣禋祀特  
有褻封申命曲加因郵併賜唯是士風之美  
素無犴獄之煩久寄託於丘墳粗諳知其閭  
里念雖閉閣殊弗廢於承流以比造朝或未  
妨於養疾矧恩勤之已迫且遜避之不容敢  
不少嘗體力之所任祇奉詔條而爲治冀逃  
大戾仰稱殊私臣無任

第二表

臣某言伏奉 制命授臣觀文殿學士吏部  
尚書知江寧軍府事臣已於六月十五日到  
任訖久妨賢路上負聖時苟逃放殛之刑更  
濫褒揚之典逸其犬馬將盡之力寵以丘園  
所寄之邦仰荷恩私皆踰分願中謝臣操行  
不足以悅衆學術不足以趨時獨知義命之  
安敢望功名之會值遭興運揔領繁機惟睿  
廣之日躋顧卑凡而坐困秋水方至因知海  
若之難窮大明旣升豈宜爝火之弗息加以

精力耗於事為之衆罪戾積於歲月之多雖恃含垢之寬終懷覆餗之懼伏蒙 陛下志存善貸為在曲成記其事國之微誠閱其籲天之至懇撓黜幽之常法示從欲之至仁經體贊元廢任莫追於既往承流宣化收功尚冀於方來臣無任

常州謝上表

以貧擇利以病辭勞此於督責之朝皆在譴訶之域中謝伏念臣比在群牧常求外官蒙恩朝廷改職畿縣未試賢勞之力已纏悻眩

之病區區本懷懇懇自訴遂蒙優詔特與便  
州維臣之愚所學非敏受祿則辭貧而取富  
當官則讓劇而求閒使有以臨知罪其極此  
蓋伏遇 皇帝陛下明照萬物寬惠四方在  
宥而不探其可誅因能而不責其所乏顧雖  
無用於當世嘗以有聞於先臣思報所蒙敢  
忘盡瘁然而州郡撫循之勢患在數更官司  
考課之方要諸久任惟茲弊邑比多凶年歲  
行兩周守吏八易當郡人煩勞之後以臣身  
疲病之餘自非少假以歲時將必上孤於器

使所祈降鑒姑使息肩則斷斷一臣不獨免  
於大戾元元萬室儻有望於小休臣瞻天禱  
聖無任

代上明州到任表

奉勅差知明州已於某月日到任訖夷越故  
區東南窮處施澤之下歡然有生庇身於茲  
坐以無事中謝臣受材素薄推數頗竒居有  
朴忠之心進無通顯之路晚塵郎位頻竊郡  
章歸待罪於省中退得藩於海上自初受命  
以至造官歷年兩周取道萬里備更艱阨職

臣之分使然卒就宴安賴上之恩抵此餘年  
且索旅力已愆尚何施爲可以報稱於苟利  
國家之事靡所不思及未填溝壑之時庶幾  
自愧

謝免南郊陪位表

臣某言近具表爲疾病乞免赴闕南郊陪位  
伏蒙 聖慈特賜詔書許免者螻蟻惓惓上  
干旒袞雲天顛顛俯賁丘園臣憊矣微生頽  
然暮齒冒恩鼎石非堅卧以爲高承命旌招  
宜駮奔而反後顧緣衰疾致隔清光伏蒙

陸下特赦尤違曲垂念聽部昏難望尚延舜  
日之華荒翳易遺更獲堯雲之潤臣無任感  
天荷聖激切屏營之至

謝免明堂陪位表

臣某言近具表爲疾病乞免赴闕明堂陪位  
伏蒙 聖慈特賜臣詔書許免者駿奔弗獲  
內懷逋慢之誅寵荅曰俞上荷眷憐之至伏  
念臣久違秘近遂迫衰殘長負異恩固難逃  
於幽黜敢圖釐事乃復與於詳延輒冒布陳  
重煩矜允鴻私所被藏一札以知榮旅力已



愆殞百身而何及

謝雱免中允說書表

臣某言伏蒙 聖恩授臣男雱守太子中允  
充崇政殿說書尋具劄子辭免蒙降詔書不  
允者恩驟加於私室多所超踰事或累於公  
朝誠難昧冒仰煩睿訓曲喻至懷永惟眷獎  
之殊實重兢慙之至 中謝 伏念臣首叨召節  
得侍辭林隨被贊書使陪經幄稍更歲月莫  
補涓埃竊觀上智之日躋內訟淺文而知困  
况如賤息厥有童心尚迷鑽仰之方豈稱招

延之禮恕已量主非敢以私而自嫌爲官擇  
人顧雖成命而宜改輒布可辭之義上千難  
犯之威伏蒙 皇帝陛下屈體優容垂精寵  
荅謂大人照臨之道廣當養以蒙意小夫誦  
說之智專遽忘其賤褻稱備厚訓飭加嚴揣  
實未安寄顏有惡重念自古君臣之相與未  
有如臣父子之所遭蓋當用儒之時尤難講  
藝之職典謨方御實叅備於討論誥誓未終  
已繼叨於獎擢獲世官於閭巷嗣家學於朝  
廷自非忘軀何以報國知人而官以哲慨已

誤於明揚委質而教之忠誓永有於素守臣  
無任

謝賜第安國及第表

臣某言伏蒙 聖恩召試臣弟安國賜進士

及第注初等職官者儔乂之求外覃草野龍

光之施首逮門庭中謝竊以身國論聽斷之

煩而察知孤遠之行略門資貢舉之法而拔

取淹滯之才山林之所誦說而難遭閭巷之

所驚嗟而罕見伏惟 皇帝陛下協德穹昊

比明羲和博臨四方洞照萬物如臣同產為

世畸人少遭閔凶自奮寒苦雖強學力行粗  
有時名而少偶寡徒幾絕榮望豈期聖聽俯  
及幽潛遂使窮途坐階華寵獎以詔書而試  
藝賜之科第而命官祿不逮親旣永乖於養  
志仕非爲己當共誓於捐軀

謝弟安國得館職表

臣某言伏蒙 聖恩以臣弟安國充崇文院  
校書者書林置職方儲高位之材詔板推恩  
遂假私門之寵在於疵賤實以兢慙臣某誠  
惶誠感頓首頓首伏念臣初起孤生非謀膺

仕中叅近侍特荷先朝屬憂患之相仍分湮  
淪而自弃敢圖收召俯暨幽潛服在臣鄰驟  
冠論思之列恩加子弟具膺慶賞之延有味  
冒於殊私或超踰於常法惟數竒之同產嘗  
久困於稠人第冊西垣比前叨於睿獎校文  
東觀更曲被於明揚此蓋伏遇 皇帝陛下  
與善無方使能以類欲阜成於大治務博取  
於衆材遂忘形迹之嫌以溥龍光之施衰宗  
旣亢唯知上報之難小已易盈彌懼先顛之  
疾臣無任

謝差弟安上令授勅命不許辭免表

臣某言伏蒙 聖恩差弟安上提點江南東

路刑獄以臣衰疾就令照管仍傳 聖旨令

臣便授 勅命更不須辭免者江海衰殘雲

天悠遠恩言狎至感涕交流中謝伏念臣積

荷知憐初無報稱豈圖殘息上簡聖心數遣

中人間因外使喻以眷懷之至意慰其憂苦

之餘生惠焉既久而彌加告矣雖頑而未捨

乃至召見同產馳賜十行之書使營私門就

捐一路之寄訪逮織悉矜及隱微追千載之

遭逢殆無前比顧一身之糜殞安可仰酬唯當  
祇聖訓之鴻私豈敢固愚衷之小諒重念無  
傷於國體乃爲不負於天慈顧以里居之安  
而尸官廩之厚固已犯明義而累食功之實  
况復干隆名而長昧利之風至於詞窮雖競  
慙於屢黷可以理奪終冀幸於矜從

謝添差男旁甸當江寧府糧料院表

近輒冒昧陳乞男旁甸當江寧府糧料院一  
次伏蒙特恩添差者去寄卧家猶尸厚祿所  
榮及嗣更荷殊私中謝伏念臣汗馬之勞初

無可紀舐犢之愛乃敢有言顏雖腆以知慙  
心固甘於獲譴豈謂 陛下矜軒幄之舊錄  
簪履之微示特出於上恩俾遽叨於世祿繫  
曲成之造化弗以遐遺徒共誓於糜捐安能  
仰稱

謝雱除正言待制表

臣某言伏奉 聖恩除臣男雱右正言天章  
閣待制兼侍講特降中使宣諭令便授告勅  
不須辭免者孚號明恩實由中出羨官要職  
弗以次加知榮耀之及私顧僭差而累國雲



天在望冰炭交懷

中謝

臣出於羈窮好是拙

直道常違俗宜芻狗之致妖才不逮人何藿  
蠲之能化 皇帝陛下收之末路付以繁機  
距滔天之衆讒責經世之來效施及賤息度  
越稠人延登朝行使嗣講業方仰陪於膝席  
俄中廢於骭瘍雖進趨之禮久妨而問勞之  
恩狎至莫知報稱但負兢慙豈意眷憐更加  
超擢待制之爲職以陪侍禁嚴正言之爲官  
以諫救遺失承金華之舊學親玉色於燕朝  
併叨殊私甚駭群聽此蓋伏遇 皇帝陛下

攬取同智無小大之遺搜揚衆材無久近之  
間苟或不肖槩嘗有聞必垂甄收以示勸獎  
四方之訓于我無競維人多士之生斯時不  
顯亦世永惟遭值孰與等夷君臣以事道相  
求是惟希世父子以傳經見用鮮或同時雖  
媿臯陶濟美之材敢忘孤突教忠之義臣無  
任

王文公文集卷第十八

王文公文集卷第十九

表

謝宣召表

謝賜對衣鞍馬表

謝手詔令視事表

謝朱炎傳 聖旨令視事表

謝宣諭許罷節鉞表

謝給蔡卞假傳宣撫問表

謝甘師顏傳宣撫問并賜藥表

謝李舜舉賜詔書藥物表

謝中使撫問表二 謝中使宣醫表

謝宣醫劄子

謝賜湯藥表

謝勅設

謝東府賜御筵表

謝賜玉帶表

謝賜衣服銀絹等表

謝賜生日表三

謝中使傳宣撫問并賜湯藥及撫慰安

國弟亡表

謝差張諤醫男雱表

謝李友詢傳宣撫問及賜湯藥表

乞以所居園屋爲僧寺乞賜額劄子

乞將荒熟田割入蔣山常住劄子

謝以所居園屋爲僧寺及賜寺額表

謝依所乞私田充蔣山太平興國寺常

住表

謝宣召表

含哀去國扶僊造朝黼坐禁嚴許之燕見玉  
堂闕麗賜以叨居申飭使人就傳德意事雖  
有故寵實非常莫知報稱之謂何徒荷眷求  
之如此

謝賜對衣鞍馬表

出大庭之顯服束以精鏐引內廐之名駒傳

之錯采隆恩所逮朽質知榮竊念臣弱力淺  
聞以憂積疹中預從官之選外分守將之權  
僅免譴訶更蒙收召論思潤色曾莫效於微  
勞衣被服乘乃前叨於異數此蓋伏遇  
皇帝陛下醴於慶賞詳在招延因示眷懷使  
知奮勵誓竭愚忠之報冀無虛授之嫌

謝手詔令視事表

伏蒙宣示言者所奏輒具劄子乞博延公議  
改用賢人伏奉詔獎勵令視事如故者謗議  
升聞已賴舜聰之豁達懇誠上訴更煩周誥

之丁寧竊以作威者主之權待察者臣之禮  
蓋雖蒙非常之厚遇亦將避可畏之煩言臣  
志尚非高才能無異舊惟所學之迂闊難以  
趨時因欲自屏於寬閑庶幾求志惟聖人之  
時不可失而君子之義必有行故當 陛下  
即政之初輒慕昔賢際可之仕越從鄉郡歸  
直禁林或因勸講而賜留或以論思而請對  
愚忠偶合即知素願之獲申睿聖日躋更懼  
淺聞之難副重叨殊獎忝秉洪鈞所宜引分  
以固辭乃敢冒恩而輕就實恃明主知臣之

有素故以孤身許國而無疑人習玩於久安  
吏循緣於積弊窵言不忌詖行無慙論善俗  
之方始欲徐徐而變革思愛日之義又將汲  
汲於施爲以物役已則神志有交戰之勞以  
道徇衆則事功無必成之望恐上辜於眷屬  
誠竊幸於退藏猶貪仰附於末光亦冀粗成  
於薄效比聞獨斷謂合僉言但輸承命之忠  
遂觸招權之毀因請避衆賢之路庶以厭異  
議之人伏蒙 皇帝陛下敦大兼容清明旁  
燭賜之神翰諭以至懷君臣之時當千載而



難值天地之造豈一身之可酬敢不自忘形迹之嫌庶協神明之運

謝朱炎傳聖旨令視事表

臣某言三月二日提舉江南路太常丞朱炎傳聖旨令臣便視府事者使指端臻訓辭俯逮敢圖衰疾尚悞眷存中謝伏念臣曲荷搜揚久辜付屬有能必獻未嘗擇事而辭難無力可陳乃始籲天而求佚然方焦思有爲之日以此懷恩未報之身苟營燕安豈免慙悻伏蒙 陛下仁惟求舊義不忘遐乃因乘輶

賦命之臣更喻推轂授方之意踦履無用誠  
弗忍於弃捐朽株匪材尚奚勝於噐使永惟  
獎勵徒誓糜捐臣無任

謝宣諭許罷節鉞表

臣某言二月二十二日江東轉運使孫珪到  
府伏奉 聖慈宣諭以臣誠請甚確志不可  
奪故罷節鉞春時更宜慎愛者囊封屢黷特  
荷矜從使傳載馳重煩慰撫中謝伏念臣久  
尸榮寵莫報恩私既逃不職之誅更竊無功  
之祿閉門養疾曾未愁於朝榮擊壤歌時顧

難忘於聖力伏蒙 陛下義惟求舊仁不棄  
遐故雖簪履之遺尚蒙簡記曾是筋骸之束  
敢愛糜捐

謝給蔡卞假傳宣撫問表

伏蒙聖恩以臣疾病特給蔡卞假將臣女子  
省侍令卞傳宣撫問諭以調養者飭醫遣使  
已叨訓勉於禔身輟侍子寧重累顧哀於慈  
子救言狎至感涕交流臣趨尚缺如遭逢桀  
甚竊食浮而廢任特負知憐昧祿殖以挺灾  
終貽罪疾伏遇 皇帝陛下地容天幃雲蔭

露濡响吹晚出於更生拊偃申加於瀕死譬  
如造化難紀叙於曲成雖曰糜捐敢稱論而  
上報

謝甘師顏傳宣撫問并賜藥表

膚使寵辭載華原隰寶盍珍劑加賁丘園臣

中謝

伏念臣少出衡茅晚陪帷幄德輶寄重

才淺知深但念里居長負丘山之責敢期宸  
眷尚留簪履之矜此蓋伏遇 皇帝陛下天  
情無疆海函不弃戴難忘之盛德豈特銘肌  
撫易盡之餘生唯當結草

謝李舜舉賜詔書藥物表

輟宮闈親近之臣臨湖海寬閑之野授之藥物撫以訓辭尸厚祿而無勞謂當誅絕捐大恩而不報彌所兢慙臣

中謝

伏念臣出本羈

單自甘淪弃晚由朴學上悞聖知智曾昧於保身忠每懷於許國讒誣甚巧切憂解免之難危拙更安特荷眷憐之至况遠迹以孤之地實邇言易間之時而離明昭晰於隱微解澤頻繁於踈逖此蓋伏遇 皇帝陛下以上仁含垢以大智容愚弗使南箕得侈簸揚之

狀更令北戶坐蒙臨照之光茆然垂盡之病  
軀沲若橫流之感涕惟困窮無俚猶致命於  
一餐顧冒昧不貲敢忘懷於九死

謝中使撫問表

孤臣疲曳自阻進趨上主慈憐猶加撫諭

中

謝伏念臣晚陪休運特荷異恩橫草無功每  
恨弃軀之晚負薪有疾仍慙制祿之優豈謂  
陛下所揔萬機不忘一物迺因輜軒之出濟  
逮躋履之遺仰荷眷私唯知感涕

又

去國彌年屢煩慰恤乘輅便道復賜撫存中謝  
伏念臣冒恩殊深奉事多廢以素餐而無責  
方宿疚之有加弗以遐遺實仰慙於眷遇莫  
知上報徒永誓於糜捐

謝中使宣醫表

乘褻遘厲敢意浼聞軼舊垂矜曲加寵數即  
馳近御兼飭太醫錫以寶奩實之珍劑創殘  
再肉顛眴更蘇沓被慈憐不勝負荷臣叨恩  
缺報昧祿取灾果崇降以疾殃至上煩於愍  
惻此蓋伏遇 皇帝陛下履簪念厚軒幄眷

深天弗籲而亦臨雲甫瞻而旣雨哀逾察父  
感劇孤臣論可報之涓埃難知稱效顧未填  
之溝壑徒誓糜捐撫涕沈瀾捫心躑躅

謝宣醫劄子

食浮挺災自取危疾敢籲天聽上煩愍惻不  
圖聞徹特冒慈憐亟遣內臣挾醫馳降臣背  
瘡餘毒即得仇齏敷貼平完尚以風氣冒悶  
言語蹇澁又賴杜壬診療尋皆痊愈臣迫於  
衰莫自分捐沒聖時朽骸更生實叨殊賜戴  
天荷地感涕難言臣瞻望闕庭不任屏營沈



瀾激切之至

謝賜湯藥表

隆恩博施弗以遐遺弱力薄才豈能仰稱中謝  
臣乂辜重任上誤聖知特荷眷憐備昭誠悃  
付以便安之郡休其疲曳之軀跋涉之路未  
窮問勞之恩先至璽書甚厚藥物兼珍此蓋  
伏遇 皇帝陛下丕冒海隅寵綏臣庶簪履  
之舊不忍於弃忘雲天之高每存於庇幃永  
惟報效徒誓糜捐

謝勅設

職豫論思恩加橐飫禮雖有舊寵實難當伏  
念臣本乏才稱中緣疾廢適從孤遠獲侍清  
光已污禁林之廬重叨太官之賜蓋飲食有  
文王之雅實始憂勤顧來歸無吉甫之勞徒  
多燕喜敢忘自竭粗稱所蒙

謝東府賜御筵表

伏奉差中使傳宣今月七日辰時三刻遷入  
新府并借官車就賜筵者恩厚不貲誠先賢  
之務稱頑冥無似欲報國而知難臣等過以  
凡材並膺殊選久壅賢路上辜聖時伏惟

陛下謀德在容求仁以恕謂大臣方宣勞於  
王室則明主當加恤其私家發使禁闈之中  
俾視魏闕之下取才置業皆斷於睿謀成事  
告初不煩於宰旅重明衡蓋周視庭除申以  
中人喻之良月使及日辰之吉即于堂寢之  
安輟車府之傍牽載其帑重移饗官之烹割  
侑以鼓歌歡更逮於邇臣寵先加於小已陰  
陽或謬未知瘳理之方風雨其除徒賴帡幪  
之賜

謝賜玉帶表

臣某言伏蒙 聖恩以收復熙河洮岷疊宕  
等州特加褒諭親解玉帶賜臣者尸臣列侍  
方臨極辨之朝誓御瞻傳獨拜非常之賜寵  
綏狎至懇避弗俞焜耀有加凌兢無措 中謝  
竊以河洮之業非自聖謨方虎之材進非師  
錫片言投匭遂察見其有孚衆訛盈庭預照  
知其無眚以至授兵筭食蒐卒第功能畢協  
於始謀實仰歸於獨斷如臣蕞爾何力有焉  
伏惟 皇帝陛下善貸且成勞謙不伐弛曠  
瘵之大責錄將明之小忠揚于廣除委以珍

御瑟彼英瑤之質煥乎華袞之言臨授用光  
顧榮踰於古昔退藏惟謹知燕及於雲來施  
更厚於解衣報敢忘於結草

謝賜衣服銀絹等表

臣某言今月十一日准都進奏院遞到詔書  
并別錄賜臣衣服金帶魚袋銀器絹銀鞍轡  
馬者慰藉溢言上幸寵眷匪頒異數特荷恩  
憐臣晚以薄材嘗陪輿運華原之簪未愁每  
辱矜收橋山之劍初遺獨悲淪沮伏蒙  
皇帝陛下勤追考翼厚勉臣中遽被寵光申

加蕃庶雖負薪之未力難效驅馳顧結草之  
殘魂猶知報稱

謝賜生日表

臣某言伏蒙 聖慈特差臣女壻前守常州  
江陰縣主簿蔡卞泐路押賜生日禮物衣一  
對衣著一百匹金花銀器一百兩馬二匹金  
鍍銀鞍轡一副者寬假之恩幸從於私欲匪  
頒之寵尚玷於常科知報稱之良難積驚慙  
而實厚伏念臣見收未路承乏近司犬馬之  
力已殫訖無補報螻蟻之誠自列竊幸退藏

尚兼將相之崇且受藩維之託叨逾已極賜  
與更蕃此蓋伏遇 皇帝陛下仁冒海隅禮  
優臣庶宥衆尤之積累示全度之并包爰及  
微生具膺殊獎致養以樂永懷弗洎之悲移  
孝則忠敢怠進思之義臣無任

第二表

慰藉溢言匪頒異數荷恩勤之及此思報稱  
以蔑然 中謝 伏念臣繆簡帝心叨陪大政以  
少孤之樸學當難遇之盛時雖罄愚忠何裨  
聖治門弧可想方永念於劬勞臺餽有加更

上煩於寵獎此蓋伏遇 皇帝陛下施仁品  
物致禮臣隣將備責於安危故俯同於憂樂  
所願輸忠而後食敢知得賜之為榮矧生已之  
至恩已云不報獨事君之大義庶或無慙

### 第三表

璽書加獎臺餽示優屈使者之光華發里門之

榮耀

中謝

切念臣才非秀穎勢又羈單方少

也臣父教臣以為已之方及長也臣母勉臣  
以許國之節叨踰至此稱效闕然慈訓久孤  
每感劬勞之日恩頒荐至更慙明盛之朝此



蓋伏遇 皇帝陛下智臨方來慈保臣庶嘉  
以物多而備禮使知意厚而盡心敢不自竭  
断断之能庶以少申惓惓之義

謝中使傳宣撫問并賜湯藥及撫慰安國弟亡表  
便蕃曲澤雖遠不忘晷晷餘年懼終莫報伏  
念神臣辭恩機要藏疾里閭旣疲瘵之未夷  
顧憂傷之重至仰煩眷獎特示閔憐中飭使  
輶備宣恩厚寵頒藥物深念衰殘此蓋伏遇  
皇帝陛下日月照臨乾坤覆燾俯矜舊物曲  
軫睿慈始終顧遇之私人知無替存沒榮懷

之感情實難勝

謝差張諤醫男雱表

臣某言伏蒙 聖慈特差中使傳宣問并賜

臣男雱湯藥押冲靜處士張諤至本府醫治者叢爾餘生備叨眷撫茆然賤息更荷哀憐

中謝

臣初乏將明之材適遭開泰之運父子並

蒙寵獎臣鄰莫與等夷去闕以來歷時未久問勞狎至憂軫俯加以察父之鴻私施具臣之晚節但慙疲曳莫副馳驅冀憑天地之恩得全駒犢之命永依鞭筴共誓糜捐臣無任

謝李友詢傳宣撫問及賜湯藥表

臣某言伏奉 聖慈特差李友詢扶護亡男

雱棺柩到府并撫問者孤臣特荷慈憐未獲  
捐軀報德賤息比叨寵獎復以遺骨累恩臣

中謝伏念臣釁積自躬凶流及嗣因仍積歲

藏厝不時敢謂私憂上貽聖慮伏蒙 皇帝

陛下飭遣親使護致旅棺使士子之魂即安  
於窀穸天性之愛得盡於莫年申之訓辭撫  
以藥物眷被終始施兼存亡銘骨不足以敘  
欲報之心瀝肝不足以繼感泣之血獨恨既

愆之力莫知自効之方

乞以所居園屋爲僧寺乞賜額劄子  
臣幸遭興運超拔等夷知獎眷憐逮兼父子  
戴天負地感涕難勝顧迫衰殘糜損何補不  
勝螻蟻微願以臣今所居江寧府上元縣園  
屋爲僧寺一所永遠祝延聖壽如蒙矜許特  
賜名額庶昭希曠榮遇一時仰憑威神誓報  
無已

乞將荒熟田割入蔣山常住劄子

臣父子遭值聖恩所謂千載一時臣榮祿旣

不及於養親雱又不幸嗣息未立奄先朝露  
臣相次用所得祿賜及蒙恩賜雱銀置到江  
寧府上元縣荒熟田元契共納苗三百四十  
二石七斗七升八合廢一萬七千七百七十  
二領小麥三十二石五斛二升柴三百二十  
束錢五十四貫一百六十二文省見託蔣山  
太平興國寺收歲課爲臣父母及雱營辦功  
德欲望聖慈特許施行充本寺常住矜遠追  
薦昧冒天威無任祈恩屏營之至取 進止  
謝以所居園屋爲僧寺及賜寺額表

基迹藪祠冀鴻延於萬壽錫名扁榜竊榮遇  
於一時臣生乏寸長世叨殊獎賤息奄先於  
犬馬頽齡俯迫於桑榆獨念親逢莫有涓埃  
之補報永惟宏願豈忘香火之因緣伏蒙  
皇帝陛下俯徇祈誠特加美稱所懼封人之  
祝終以堯辭乃塵長者之園遽如佛許仰憑  
護念誓畢薰脩

謝依所乞私田充蔣山太平興國寺  
常住表

緣恩昧冒方虞恩上之誅加意畀矜遂竊終

天之幸伏念臣少嘗陲阨晚悞褻崇榮祿雖  
多不逮養親之日餘年向盡更爲哭子之人  
追營香火之緣仰賴金縉之賜尚復祈恩而  
不已乃將徼福於無窮伏蒙 陛下眷遇一  
於初終愛恤兼夫存沒特撓常法俯成私求  
雖老矣無能莫稱漏泉之施若死而未泯豈  
忘結草之酬臣無任瞻天望聖激切屏營之  
至

王文公文集卷第十九





王文公文集卷第二十

表

進熙寧編勅表

謝賜元豐勅令格式等表

謝賜曆日表二

謝手詔索文字表

擬上殿進劄子

進字說表

進說文劄子

乞改三經義劄子

改撰詩義序劄子

進二經劄子

進鄴侯遺事劄子

進聖節功德疏右語

南郊進奉狀

勅修南郊式表

進洪範傳表

笏記

進熙寧編勅表

竊以觀天下之至動而御其時輔萬物之自  
然而節其性匿而不可不爲者事麤麤而不可  
不陳者法厥惟無弊乃以不膠故造象於正  
月之始和改禮以五載之巡狩一代之典成  
於緝熙百世可知在所加損方裁成輔相之  
休運宜修飾潤色之難能顧匪其人與於此  
選中謝蓋聞道有升降政有弛張緩急詳略  
度宜而已使民不倦惟聖爲能伏惟 皇帝

陛下天德地業體堯蹈禹永念憲禁之舊或  
失防範之中選建有官付之論定具慙淺學  
莫副詳延屢彌歲年僅就篇秩刪除煩複蒐  
補闕遺於趣時治世則粗掄抗弊之實以方  
古垂後則或俟新美之才冒昧天威姑塞明  
詔

謝賜元豐勅令格式等表

臣某言伏蒙 聖慈特賜臣元豐勅令格式一  
部計四十策者新厥品章著之方冊雖孤眷寄  
尚冒分頒日中謝切以后辟之所訓裁臣工之

所承守歷觀既往或仍踳駁之餘緒正厥遺實  
待緝熙之久恭惟 皇帝陛下操天縱之智  
御物昌之時勅法於群幾之先收功於異論  
之後慮無愆素舉必要終然趨變以制宜或  
非初令則取新而垂裕宜有成書神機俯授  
於有官聖制遂摠於無極部居彪列科指曠  
分雲漢之回甚昭日月之照方以 臣進陪國  
論退即里居在昔討論嘗負曠穰之責於今  
尊閣更知被受之榮

謝賜曆日表

太史序年將謹人正之授遠臣尸祿乃叨天  
指之加臣中謝切以欽若昊穹靈承黎庶正  
時所以作事治曆所以明時恭惟 皇帝陛  
下道邁古初德綏方夏治教之象上協於天  
心正朔所加外通乎海表敢圖幽屏亦誤寵  
頒徒尊閣以知榮曷糜捐之可報

又

清臺課曆肇明一歲之宜列郡仰成欽布四  
時之事闕文切抃拜賜爲榮恭惟 皇帝陛  
下躬包曆數政順璣衡齊日月之照臨體乾

坤之闔闢考觀新度遠存堯象之明推步大  
端猶得夏時之正盡俯仰察觀之理槩裁成  
輔相之宜歲事備存詔文偕下先天誕告間  
無杪忽之差率土逢占驗若節符之合臣敢  
不恭承睿旨順考時行贊聖神化育之功極  
天人和同之効奉而行政期不戾於陰陽推  
以治人庶克躋於富壽

謝手詔索文字表

雲漢之光俯加賁冒管蒯之賤仰俟詢求中  
謝切以百王之道雖殊其要不過於稽古六

藝之文蓋闕其教猶足以範民惟其測之而  
彌深故或習矣而不察紹明精義允屬休辰  
伏惟 陛下有堯之文明有湯之勇智以身  
爲度動皆應於乾行肆筆成書言必稽於聖  
作欲推闡先王之大道以新美天下之英才  
宜得醇儒使陪能事且生非秀穎衆謂迂愚  
徒以弱齡粗知強學眼膺前載但傳糟粕之  
餘追首大方豈逮室家之好過叨睿獎使緝  
舊聞永惟少作可棄之浮辭安能上副旁求  
之至意伏望矜其聞道之晚假以歷年之淹

使更討論粗如成就然後上塵於聰覽且復  
取決於聖裁庶收寸長稍副時用

擬上殿進劄子

臣蒙恩奉使歸報 陛下敢因邊事之所及  
冒言天下之事伏惟 陛下詳思而擇其中  
天下幸甚臣切見 陛下有恭儉之德有聰  
明睿智之才有仁民愛物之意顧內不能無  
以社稷爲憂則外不能無患於夷狄天下之  
才力日以窮困而風俗日以衰壞四方有智  
之士惴惴然常恐天下之不久安此其故何



也患在無法度故也今朝廷法嚴令具無所  
不有而臣以謂無法度者方今之法度多不  
合於先王之法度故也孟子曰有仁心仁聞  
而人不被其澤者爲政不法先王之道故也  
非此之謂乎以今之時方先王之時遠矣所  
遭之時所遇之變不同而欲一二修先王之  
政雖甚愚者猶知其難也而臣以謂當今之  
失患在不法先王之政者以謂當法其意而  
已夫五帝三王相去蓋千有餘歲一治一亂  
盛衰之時具矣其所遭之變所遇之勢不同

其施設之方亦皆殊而其爲國家之意本末  
先後未嘗不同也臣故曰當法其意而已法  
其意則吾所改易更革不至乎傾駭天下之  
耳目囂天下之口而固已合乎先王之政矣  
雖然以方今之勢揆之 陛下雖欲改易更  
革天下之事合於先王之意其勢未必能也  
陛下有恭儉之德有聰明睿智之才有仁民  
愛物之意則何爲而不成何欲而不得而且  
固以謂雖欲改易更革天下之事合於先王  
之意其勢未必能者何也方今天下之吏才

少故也朝廷之人才固嘗簡在 陛下之聰  
明以目使事之所及則一路數千里之間能  
推行朝廷之法知其所緩急而一切能脩其  
職事者甚少而不才苟簡貪鄙之人至不可  
勝數其能講先王之意以合當世之變者蓋  
闔郡之間往往而絕也夫人才不足則 陛  
下雖欲改易更革天下之事以合先王之意  
大臣雖有能當 陛下之意而領此者九州  
之大四海之遠萬官之衆孰能一二推行之  
使人人蒙其施者乎且故曰其勢未必然也

然則方今之急在乎人才而已今之天下亦  
先王之天下先王之時人才嘗衆矣蓋其所  
以陶冶而成之者有道所謂陶冶以成之者  
詩書傳記之所載其大略可見矣 陛下嘗  
試詳延大臣左右及天下智能才諳之士使  
其論先王所以成天下之才者其施設之方  
如何今之所以異於先王而人才不足者其  
咎安在其欲變而通之以合於先王之意而  
成天下之才宜何施爲而可 陛下因擇其  
言之近於理者使之相與上下反覆爲論焉

因取其宜於時者施焉則人才宜衆矣夫成人之才甚不難人所願得者尊爵厚祿而所榮者善行所恥者惡名也今操利勢以臨天下之士勸之以其所榮而予之以其所願則孰肯背而不爲者特患不能爾而吾所以責之者又中人之所能爲則不能者又少矣夫成人之才甚不難而自古往往不能成人之才何也以人主之才不足故也蓋人主無恭儉之德無聰明睿智之才無仁民愛物之意則嬖倖諂諛姦罔蔽欺殘賊放恣之人皆得

志於時而推其類以亂天下雖有良法不能  
成天下之才矣今 陛下有恭儉之德有聰  
明睿智之才有仁民愛物之意而又因天下  
之所願以爲輔相者公聽並觀以進退天下  
之士則所以成天下之才特患無良法而

陛下推至誠惻怛之心以行之則臣雖愚固  
知人之才不難成也人才旣衆則 陛下何  
爲而不成何欲而不得夫然後改易更革天  
下之事以合乎先王之意甚易也 陛下不  
能如此苟於積敝之末流因不足任之才而

修不足爲之法臣恐在軍者日以勞而士民  
愈以窮困汚濫而於天下國家愈其無補也  
臣幸以使事歸報徒舉利害之一二而無補  
於世非臣之所以事 陛下惓惓之義也輒  
不自知其駑下而敢言國家之大體伏惟  
陛下詳擇其中天下幸甚也

進字說表

竊以書用於世久矣先王立學以教之設官  
以達之置使以諭之禁誅亂名豈苟然哉凡  
以同道德之歸一名分之守而已道衰以隱

官失學廢循而發之實在聖時豈臣愚僮敢  
逮斯事中謝蓋聞物生而有情情發而爲聲  
聲以類合皆足相知人聲爲言述以爲字字  
雖人之所制本實出於自然鳳鳥有文河圖  
有畫非人爲也人則効此故上下內外初終  
前後中偏左右自然之位也衡邪曲直耦重  
交析反缺倒仄自然之形也發斂呼吸抑揚  
合散虛實清濁自然之聲也可視而知可聽  
而思自然之義也以義自然故先聖之所宅  
雖殊方域言音乖離點畫不同譯而通之其



義一也道有外降文物隨之時變事異書名  
或改原出要歸亦無二焉乃若知之所不能  
知思之所不能至則雖非即此而可證亦非  
舍此而能學蓋惟天下之至神爲能究此伏  
惟 陛下體元用妙該極象數稽古勅法紹  
天覺民乃惟茲學殞缺弗嗣因任衆智微明  
幽隱蓋將以合乎神指者布之海內衆妙所  
寄窮之實難而且頃御燕閒親承訓勅抱病  
負憂久無所成雖嘗有獻大懼浼冒退復自  
力用忘疾備諮諏討論博盡所疑冀或消塵

有助深崇謹勒成字說二十四卷隨表上進  
臣某誠惶誠恐頓首頓首謹言

進說文劄子

臣在先帝時得許慎說文古字妄嘗覃思究  
釋其意冀因自竭得見崖略若矇視天終以  
罔然念非所能因畫而已頃蒙聖問俯及退  
復甞勉討論賴恩寬養外假歲月而桑榆憊  
眊久不見功甘師顏至奉被訓敕許錄臣愚  
妄謂然者繕寫投進伏惟天明包燭無疆豈  
臣熒爝所敢銜冒承命遑迫兢慙無所如蒙

垂收得御宴間千百有一儻符神指愚所逮  
及繼今復上千汙宸扆臣無任

乞改三經義劄子

臣頃奉勅提舉脩撰經義而臣聞識不該思  
索不精校視不審無以稱陛下發揮道術  
啓訓天下後世之意上辜眷屬沒有餘責幸  
蒙大恩休息田里坐竊榮祿免於事累因得  
疾病之間攷正誤失謹錄如後伏望清燕之  
閒垂賜省覽儻合聖心謂當刊革即乞付外  
施行臣干冒天威無任

尚書義

臯陶謨按見其惡當作按其見惡。益稷故懋使之化當作則懋使之化。微子純而不雜故謂之犧犧當作牲完而無傷故謂之牲牲當作犧。洪範有器也然後有法此書所以謂之範者以五行爲宗故也五行猶未離于形而器出焉者也擴而大謂之弘積而大謂之丕合而大謂之洪此書合五行以成天下之大法故謂之洪範也已上七十一字今欲刪去又云陶復陶穴尚矣後世易之棟宇

而其官猶曰司空因其故不忘始也已上二十六字今欲亦刪去。周官唐虞稽古字上漏曰字

周禮義

小宰其財用上其字當作共。大府受藏之府則若職內掌邦之賦入是也受用之府則若職歲掌邦之賦出是也已上三十字今欲刪去。黨正歲屬其民者四四當作五。誦訓以詔王觀事當去王字。典瑞手足腹背手當作首。冢人山林之尸則以山虞已上

八字今欲刪去。御僕掌萬民之復復當作  
逆。大馭有軌也軌當作軌。大行人三公  
八命出封加一命則謂之上公已上十四字  
今欲刪去

詩義

北風北風以言其威雨雪以言其虐涼者氣  
也嗒者聲也雩蓋言聚霏蓋言散氣之所被  
者近聲之所加者遠聚則一方而已散則無  
所不加此言其爲威虐後甚於前也已上六  
十三字今欲刪去改去北風之寒也而以爲

涼北風之厲也而以爲喑此以言其爲威雨  
雪之散也而以爲雩雨雪之集也而以爲霏  
此以言其爲虐。君子偕老玼兮玼兮其之  
翟也者服之盛也服之盛字下今欲添質宜  
之三字又云瑳兮瑳兮其之展也蒙彼縞絺  
是泄袷也者亦服之盛也亦服之盛字上欲  
減亦字服之盛字下欲添文宜之三字。定  
之方中說于桑田者者當作則。干旄州里  
之士所建今欲改爲鄉黨之官所建。有女  
同車公子五爭爭當作諍。駟鐵馬馬旣閑

駟當作四。墓門食榘而甘榘當作葦。七月去其女桑而猗之然後柔桑可得而求也。已上十六字今欲刪去改去承其女桑而猗之然後遠揚可得而伐也又蠶月者非一月故不指言某月也下添去蠶女事也故稱月焉又去猗薪之也言猗女桑則遠揚可知矣言伐遠揚則女桑可知矣皆伐而猗之也已上三十字今欲刪去。車攻言其連絡布散衆多若弈棋然已上十二字今欲刪去。小旻發言盈廷廷當作庭。桑扈受福不那那



當作那。生民麻麥。蒙蒙麥當作麥。公劉  
篤之字从竹从馬。馬行地無疆。以竹策之。則  
力行而有所至。篤之爲言力行而有所至也。  
已上三十四字今欲刪去。卷阿藹藹然盛  
多然當作其又云故次以旣醉太平也多太  
平二字今合刪去。召旻昏非所以爲哲字  
上漏明字今合添。時邁政之所加。孰敢不  
勤懼今欲改云攻之所加。孰敢不震動。疊息  
那磬管將將管當作筦。

又劄子

臣近具劄子奏乞改正經義尚有七月詩剝  
棗者剝其皮而進之養老故也十三字謂亦  
合刪去如合聖心亦乞付外施行

改撰詩義序劄子

臣伏奉三詔以臣所進三經義序有過情之  
言宜速刪去臣雖嘗敷奏以爲文字所宜又  
奉 聖訓再三但令序述解經之意不須過  
有稱道伏惟 皇帝陛下盛德至善敷于四  
海非臣筆墨所能加損然因事宜著人臣之  
職也誠以言之不足爲懼不以近於媚諛爲

嫌而上聖所懷深仁謙損臣敢不奉承詔旨  
庶以仰稱堯禹不爭不伐之心所改撰到詩  
義并前進書禮義序謹隨劄子投進昧冒天  
明臣無任

進二經劄子

臣蒙恩免於事累因得以疾病之餘日覃思  
內典切觀金剛般若維摩詰所說經謝靈運  
僧肇等注多失其旨又疑世所傳天親菩薩  
鳩摩羅什慧能等所解特妄人竊藉其名輒  
以己見爲之訓釋不圖上徹天聽許以投進

伏惟 皇帝陛下宿殖聖行生知妙法方冊  
所載象譯所傳如天昭曠靡不憐察豈臣愚  
淺所敢冒聞然方大聖以神道設教覺悟群  
生之時羽毛皮脍之物尚能助發實相况臣  
區區嘗備顧問又承制旨安敢蔽匿謹繕錄  
上進干浼天威臣無任惶愧之至

進鄴侯遺事劄子

臣前日伏奉 聖旨許進鄴侯遺事今繕錄  
已具然無別本叅校恐不能無脫誤竊以字  
文黑獺之中材遇傾側窮困之時而輔以區

區之蘇綽然其爲法尚有可取伏惟陛下  
天縱上智卓然之材全有百年無事萬里之  
中國欲勅葉垂統追堯舜三代在明道制衆  
運之而已如李泌所稱豈足道哉顧求多聞  
以考古今得失之數則此書亦或可備省覽  
謹隨劄子上進

進聖節功德疏右語

竊以紹皇策以降神千齡莫擬歸寶坊而獻  
福萬寓惟均矧荷眷之特殊固輸誠之獨至  
伏願三靈協祐十方證知常儲有羨之祥永

御無疆之曆且無任傾軫之至

又

竊以星虹獻瑞寶啓聖於嘉時鍾唄乞靈敢  
歸誠於妙道伏願備膺多福大庇群生人永  
恬愉之安物無疵癘之苦天枝彌茂神睠具  
依

又

竊以誕降聖神適天人之嘉會虔祈祉福乃  
日子之至情伏願三靈協慶萬寶皆昌永御  
無疆之寶曆丕承未艾之閔休

又

竊以握符踐運與時物以皆昌歸德謝生在  
情文而莫稱敢憑慈祐申祝壽祺伏願筭比  
天崇葉侔地富常御華胥之至樂永錫皇極  
於黎元

南郊進奉狀

右伏以郊兆宗祈臣工顯相慶九畿之藩屏  
備萬物之貢輸前件物掌於邦財斂自民職  
切覩燎煙之盛式修幣獻之常臣無任

勅修南郊式表

郊丘事重筆削才難猥以微能叨承遴選臣  
某等誠惶誠恐頓首頓首蓋聞孝以配天爲  
大聖以饗帝爲能越我百年之休明因時五  
代之流弊前期戒具人輒爲之騷然臨祭視  
成事或幾乎率爾蓋已行之品式曾莫紀於  
官司故國家講燎禋之上儀而臣等承撰次  
之明詔迨茲彌歲僅乃終篇猶因用於故常  
特刪除其紛冗恭惟 皇帝陛下體聖神之  
質志文武之功嘉與俊髦靈承穹昊物方鬯  
茂以薦信而無慙人具昭明知固陋之爲耻



固將制禮作樂以復周唐之舊豈終循誦習  
傳而守秦漢之餘則斯書也譬大輅之椎輪  
與明堂之營室推本知變實有考於將來隨  
時施宜亦不爲乎無補

進洪範表

臣聞天下之物小大有彝後先有倫叙者天  
之道叙之者人之道天命聖人以叙之而聖  
人必考古成已然後以所嘗學措之事業爲  
天下利苟非其時道不虛行臣中謝伏惟  
皇帝陛下德義之高術智之明足以黜天下

之鬼瑣而興其豪傑以圖堯舜太平之治而  
朝士未化海內未服紀綱憲令尚或紛如意  
者殆當考箕子之所述以深發獨智趣時應  
變故也臣嘗以蕪廢腐餘之學得備論思勸  
講之官擢預大政又彌寒暑勲績不効俯仰  
甚慚謹取舊所著洪範傳刪潤繕寫輒以草  
芥之微求裕天地

笏記

祇荷寵靈載懷感懼竊念臣志雖慕古才不  
逮時誤蒙記憐特賜收用伏惟 皇帝陛下

紹膺天統遵養聖功旁招雋良橫及踈賤誓  
當罄竭仰稱龍光

王文公文集卷第二十



王文公文集卷第二十一

表

英宗山陵禮畢慰 皇帝表

慰太皇太后表 慰太后表

英宗祔廟禮畢慰 皇帝表

慰太皇太后表 慰太后表

曹太皇上仙慰 皇帝表

正旦奉慰表

曹太皇啓殯及復土返虞慰 皇帝表

曹太皇神主祔廟慰 皇帝表

菁祥慰表

魯國大長公主薨慰表

八皇子薨慰 皇帝表

八皇子葬慰 皇帝表

十月一日起居永安陵等處諸陵表

永昭陵奏告 仁宗皇帝七月一日旦表

英宗山陵禮畢慰 皇帝表

須百祀之材已襄葬并故設九虞之主方考祔  
儀伏惟 皇帝陛下德懋欽明道隆勤孝雖  
送終之禮已備而追遠之念甫深惟順變以

抑哀實含生之至願且限分鎮守阻預朝班

慰太皇太后表

宮車云返陵邑既營凡在照臨豈勝摧慕伏  
惟太皇太后道侔坤育仁出天成永懷愛  
孝之隆尤積悲恫之感稍舒慈念實慰輿情  
臣叨備從官限分符守徒有攀號之至痛初  
無辦護之微勞

慰太后表

威靈有集方紓於廟祧感慕無窮外覃於靈  
貊伏惟太后比賢任姒纘慶塗辛祗協孫

謀克襄大事地非蒼梧之遠勢有霸陵之安  
唯割至哀尚膺遐福且備官有守奔問無階

英宗祔廟禮畢慰 皇帝表

七月而葬既充奉於寢園萬世不祧遂崇成  
於廟室凡居覆燾同盡攀號伏惟 皇帝陛  
下膺保聖神踐行仁孝纏哀罔極率禮無違  
仙遊既集於宗祊聖念彌勤於翼室仰祈順  
變俯睠含生臣符守所櫻班朝莫預

慰太皇太后表

威靈來返祠廟有嚴序陳昭穆之倫定列祖



宗之次哀號罔極遐邇所同伏惟 太皇太后  
后功佐帝圖德齊坤載永惟孝愛尤積悲懷  
冀紓天性之慈以永母儀之福

慰太后表

宗祐告成皇靈來燕凡居覆露同盡哀摧伏  
惟 太后協慶塗山比賢大妣方正坤儀之  
位上同乾施之仁虞祔奄終攀號靡極冀哀  
恫之有節膺福履之無疆臣限守州符阻趨  
天陛

曹太皇上仙慰 皇帝表

臣某言伏以上天降禍 太皇太后奄棄大  
養伏惟 皇帝陛下攀號感慕聖情難居臣  
限以衰疾在遠不獲奔赴闕庭臣無任屏營  
摧迫之至

正旦奉慰表

伏以日晷流邁歲曆肇新 太皇太后棄捐  
宮闈奄歷時序伏惟 皇帝陛下聖孝天至  
感慕難勝臣以衰疾無緣奔走瞻望闕庭  
曹太皇啓殯及復土返虞慰

皇帝表二

臣某言伏以日月徂遷伏承太皇太后諏辰  
協吉肇啓殯宮聖情攀號何以勝處恭惟  
皇帝陛下聖孝發中天報備至感嘆摧咽遐  
邇一情

臣某言伏承太皇太后神宮復土奄及返虞  
聖心傷摧何以勝處恭惟 太皇太后天助  
懿德以扶昌運輔佐保佑功施三朝粵自棄  
捐宮闈爰及襄事 陛下哀恫夙夜發於至  
情追奉致隆有溢常禮顯情報德內外單盡  
孝治所形人用感歎臣伏限在遠無緣奔走

瞻望闕庭無任憂迫屏營之至

曹太皇神主祔廟慰 皇帝表

伏承慈聖光獻皇后神主祔廟既克禮成伏  
惟 皇帝陛下聖孝終始哀慕難勝日月徂  
遷禮有順變伏望少抑至情以幸天下

朞祥慰表

臣某言伏以日月流邁 太皇太后捐棄大  
養奄及朞祥仰維 聖孝攀慕無極伏望深  
加裁抑以幸萬方臣限以衰疾無緣奔詣闕  
庭臣無任

魯國大長公主薨慰表

臣伏觀進奏官伏報 魯國大長公主薨背  
伏惟 聖情痛悼 臣以衰疾無緣奔走伏望  
以理寬釋俯慰群情 臣瞻望闕庭無任激切  
屏營之至

八皇子薨慰 皇帝表

伏觀進奏院報八皇子薨背伏惟 聖情悲  
悼難任敢乞抑割天慈以幸萬邦 臣瞻望闕  
庭無任

八皇子葬慰 皇帝表

伏聞鄆王襄事有日靈輜即路伏惟 聖情  
悲悼難勝敢乞割抑天慈以幸天下臣瞻望  
朝廷無任憂惶懇迫之至

十月一日起居永安陵等處諸陵表  
伏以日星隨旋歲戶從邁物更收擗之候人  
積悽愴之懷恭惟 謚號皇帝躬睿廣之材  
撫休明之運協九皇而高世追三后之在天  
方以眇躬嗣膺神器想威靈之如在感氣序  
以增欵

永昭陵奏告

仁宗皇帝七月一日旦表

伏以金氣御時商聲應律仰閱火流之速俯  
沾露降之淒伏惟 仁宗皇帝功協聖謨道  
侔乾則垂至仁而不冒慶實無窮感急節以  
深追悲何有極

王文公文集卷第二十一